

Häb mi fescht!

D'Sunne hanget ganz tief am über em See
Bluetrot u wunderschön
Vo witt här ghörsch e Amsle singe
Si singt vo dir u mir
So ruehig isch's bi mir nid immer gsi
S'het mängisch gstürmt u gschneit
Jitz hocke mir da, stosse a,
dass es immer so wittergeit

**Jitz bin ig da, wott nümme ga
Häb mi fescht u la mi nie me los!
Jitz bin ig da, wott nümme ga
Häb mi fescht u la mi nie me los!**

Bisch denn cho wo ig's nümme hätt dänkt
Bisch eifach inecho
Hesch mi bi dr Hand gno u mir si zäme
Barfuss bis a ds Meer
Dört ha ig e Schatte la lige,
är het mi sithär nie me gstört.
U wenn ig ne wider mau würd traffe,
ig wüsst nümme, dass är mir het ghört.

Jitz bin ig da...

Siderhär si mir chli älter worde,
s'isch viel Wasser d'Aare ab
Mit dir isch es so liecht
Di gärn z'ha isch nid schwär
Ig hoffe, üs blybt no chli Zyt
bevor sech de d' Stilli über mi leit
u mir reise zäme um d'Wält
bevor dr letscht Vorhang gheit

**Bis denn bin ig da, wott nümme ga
Häb mi fescht u la mi nie meh los!
Bis denn bin ig da, wott nümme ga
Häb mi fescht u la mi nie meh los!**